



Komunikadu Imprensa
13 Feveiru 2023

**JSMP Asina MoU ho estrutura Suku Lifau, RAEOA no Suku Ogues, Covalima
ba
Programa Apoiu Seguransa Komunitáriu (PASK)**

Iha 26 Feveiru 2023, JSMP hamutuk ho lideransa Suku Lifau, Postu Administrativu Pante-Makasar, Rejiaun Autónomu Espesiál Oekusi Ambeno (RAEOA) asina Memorandu ba Intendimentu (*MoU*) kona-ba JSMP nia programa Apoiu Seguransa Komunitáriu (PASK) ho espesífiku atividade monitoriza ba prosesu rezolve disputa sira ho sistema justisa komunitáriu no asegura harmonizasaun entre justisa komunitáriu ho justisa formál. Antes ne'e, iha 18 Feveiru 2023, JSMP mós asina *MoU* ba programa hanesan hamutuk ho lideransa Suku Ogues, Postu Administrativu Maukatar, Munisípiu Covalima.

“Lihusi programa ida ne'e, JSMP bele fó apoiu másimu liután ba iha setór justisa tanba sei serbisu hamutuk ho autoridade komunitáriu sira ne'ebé iha papél importante hodi asegura hakmatek no armonia iha suku nia laran lihusi prosesu sira iha justisa komunitáriu. JSMP sei aproveita oportunidade hirak ne'e hodi tulun estrutura suku hasa'e sira nia koñesimentu kona-ba lei relevante sira nune'e bainhira iha prosesu rezolve disputa sira iha suku bele iha armonizasaun entre lei sira ho sistema justisa komunitáriu inklui tulun sira kona-ba oinsá atu asesu ba justisa formal. JSMP espera katak lihusi *MoU* ne'ebé parte rua asina ne'e bele sai nu'udar mata-dalan ida hodi atinje mehi sira asesu ba justisa ho justu no transparente,” dehan Sra. Ana Paula Marcal, Diretora Ezekutiva JSMP.

Iha serémónia asina *MoU* iha Suku Lifau, Postu Administrativu Pante-Makasar, RAEOA, Xefi Suku Lazaro Quenat agradese ba JSMP tanba hili ona Suku Lifau iha programa ida ne'e, nune'e bele apoiu estrutura suku sira iha rezolve disputa tanba rekoñese katak maiória estrutura suku ladun iha koñesimentu ne'ebé suficiente kona-ba lei. Xefe suku ne'e hatutan katak sira sei aproveita oportunidade ne'e ho didi'ak hodi bele hadi'ak sira nia sistema justisa komunitáriu.

Alende ne'e, Sr. Eurico da Costa Bobo nu'udár Administradór Postu Pante-Makasar, RAEOA hateten katak sei apoiu tomak ba prosesu ne'e hodi asegura comunidade sira bele hetan justisa ne'ebé loos tantu iha justisa formál no mós justisa komunitáriu.

Entretantu Meritísimu Juis, Dr. Hugo da Costa Pui, Juis Administradór Tribunál Primeira Instánsia Oekusi konsidera serbisu hamutuk entre JSMP ho suku Lifau ne'e hanesan pasu importante hodi ajuda tantu komunidadé no tribunál rasik. Juis ne'e hatutan katak justisa komunitáriu fó duni kontribuisaun ba iha serbisu tribunál nian liuliu ba kazu sira ne'ebé iha konfliktu no konsege dame-malu molok prosesu sira ne'e ba tribunál. Ida ne'e nu'udar meu atu halo armonia relasaun moris iha sosiedade nian no evita mosu tan krime seluk. Juis subliña mós katak mezmú iha krime públiku labele taka kazu maibé bainhira parte sira konsege dame malu, tribunál sei tetu nu'udar sirkunstánsia ne'ebé halo kmaan arguidu nia pena ka ka parte sira ne'ebé halo problema.

Entretantu representante Ministériu Públiku, Sr. Martinho Caet no mós Koordenadór Defensoria Públiku Oekusi, Dr. Afonso Gomes hato'o deklarasaun ne'ebé hanesan katak programa ida ne'e ajuda tebes redus sira nia serbisu tanba estrutura suku bele hala'o hela sira nia knaar iha halo dezisténsia keixa ba kazu sira ho natureza semi publiku no halo mediasaun ba kazu sivíl sira.

Entretantu Sr. Damião Quenat, nu'udar Adjuntu Komandante Polísia Eskuadra Pante Makasar, RAEOA hateten nia parte apoiu tebes ba programa JSMP nian tanba ida ne'e bele tulun komunidadé atu tesi lia tuir lei formál tanba komunidadé barak sei menus ba informasaun.

Iha biban ida ne'e, estrutura suku sira aproveita husu ba autór tribunál sira kona-ba kazu sira ne'ebé akontese iha sira nia suku liuliu kona-ba prosedimentu sira atu hetan alimentasaun ba oan sira ne'ebé inan ka aman abandona hela.

Entretantu, seremonia asina MoU iha suku Oges, Postu Administrativu Maukatar, Munisípiu Covalima, Sr. Constantinho do Carmo Cardoso, nu'udar Administradór Postu Administrativu Maukatar iha nia intervensaun agradese tebes ba JSMP tanba bele hili ona suku Oges sai suku ne'ebé JSMP bele apoiu hodi hadi'ak sira nia justisa komunitáriu nune'e bainhira autoridade suku sira halo mediasaun ba komunidadé sira nia problema labele kontráriu fali ho lei ne'ebé eziste. Autoridade postu munisípiu ne'e husu ba estrutura suku sira atu aproveita didi'ak JSMP nia prezensa hodi hasa'e sira nia koñesimentu no iha tempu hanesan husu JSMP atu bele haluan tan apoiu hirak ne'e ba iha suku sira seluk.

Parte seluk, Dr. Jose Maria de Araújo hanesan Juis Admistradór Tribunál Primeira Instánsia Suai hato'o parabens ba JSMP no autoridade suku Oges ba asina MoU refere tanba konsidera kontribui tebes ba justisa formál tanba bainhira autoridade suku sira bele rezolve duni komunidadé sira nia disputa ne'ebé ho justu no tuir lei, ida ne'e sei halo kma'an tribunál nia serbisu alende tanba autoridade suku sira iha papél importante iha hadame parte rua no mós entre família ho família.

Alende ne'e, representante Defensoria Públiku, Dr. Domingos dos Santos hateten katak serbisu hamutuk entre JSMP ho estrutura suku Lifau halo kmaan mós Defensoria Públiku nia serbisu iha papél halo mediasaun ba kazu sivíl entre parte sira

hanesan kazu envolve família no mós rai no seluk tan. Nune'e defensor ne'e hateten nia parte prontu apoiu ba prosesu ne'e tomak bainhira JSMP no autoridade suku presiza sira nia intervensaun.

Parte seluk, Sr. Anacleto da Costa nu'udar segundu Komandante PNTL Postu Maukatar, hateten durante ne'e iha duni kazu balun ne'ebé sira koko rezolve iha nivel polisia liuhusi OPS ba kazu ho natureza semi públiku, nune'e ho JSMP nia apoiu ida ne'e hanesan pasu ne'ebé importante no sira nia parte prontu hodi apoiu.

Parte seluk, Sr. Nivio Benevides nu'udar representante husi Embaixada Nova Zelândia konsidera asina MoU ida ne'e importante tebes, tanba liuhusi programa ne'e JSMP bele tulun hodi hasa'e estrutura suku sira nia koñesimentu kona-ba justisa formál no mós lei relevante sira nune'e bainhira rezolve disputa entre comunidade la hamosu konfuzsaun. Tanba Embaixada Nova Zelandia konsidera importante tebes atu asegura justisa ne'ebé di'ak ba comunidade sira hotu nune'e husu ba estrutura suku sira atu aproveita oportunidade ne'e ho didi'ak hodi tulun comunidade sira iha asesu ba justisa ne'ebé justu no asegura iha ikus comunidade sira bele uza kustume tuir lei aplikavel.

Iha biban ne'e, estrutura suku sira aproveita husu pergunta sira ba autoridade sira tribunál nian kona-ba prosesu disputa no kazu krime sira ne'ebé akontese iha sira nia suku.

Iha seremonia asina *MoU* iha Suku Lifau, Postu Administrativu Pante Makasar, RAEOA, alende partisipa husi parte sira ne'ebé halo intervensaun, partisipa mós husi estrutura suku hanesan xefi aldeia husi aldeia tolu mak hanesan Nefobai, Oemolo no Tula Ika, Lia-nain Suku Lifau, Lia-nain husi aldeia tolu, delegada no delegadu, representante Joven Mane no Feto Suku Lifau, Xefi bairu, OPS Suku Lifau no ekipa TAF.

Nune'e mós, iha seremónia asina *MoU* iha Suku Oges, alende partisipa husi parte sira ne'ebé halo intervensaun, partisipa mós husi estrutura suku hanesan Xefi Aldeia sira, lia-nain suku no lia-nain aldeia, representante joven feto no mane iha suku, lia-nain uma lisan, delegada no delagadu, membru KPK, kableha ho maksawar aldeia nian, OPS Suku Oges no ekipa TAF.

Programa Apoiu Seguransa Komunitariu (PASK) nu'udar serbisu hamutuk entre JSMP ho The Asia Foundation (TAF) ne'ebé finansia husi Embaixada Nova Zelandia hodi halo peskiza kona-ba oinsá efeitu husi justisa komunitáriu ba rezolve disputa sira iha comunidade.

Husi programa ne'e JSMP hasoru ona Lideransa Suku inklui ho estrutura sira no lia-nain sira iha suku hamutuk 9 iha Munisípiu lima (5) mak hanesan Baukau, Covalima, Ermera, Aileu no RAEOA. Iha ikus, JSMP ho TAF konklui ho opsaun hodi halo monitorizasaun ba Suku hat (4) hanesan Suku Samalete, Postu Administrativu Railako, Munisípiu Ermera, Suku Oges, Postu Administrativu Maukatar, Munisípiu

Covalima, Suku Lifau, Postu Administrativu Pante Makasar, RAEOA, Suku Uma Ana-Ulu, Postu administrativu Venilale, Munisípiu Baukau.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>